

AWIG - AWIG DESA PAKRAMAN SUSUT



DESA BUAHAN
KECAMATAN PAYANGAN
KABUPATEN GIANYAR

AWIG - AWIG DESA PAKRAMAN SUSUT



DESA BUAHAN
KECAMATAN PAYANGAN
KABUPATEN GIANYAR

MURDHA CITTA

AUM, OM

Om Swastyastu, Om Awighnamastu Nama Siddham.

Malarapan panghyangning Ida Sang Hyang Widhi Waça, asung kerta nugraha ngawentenang kahuripan sakala niskala, ring Bhuwana Agung lan Bhuwana Alit. Manut dresta desane wantah pawakan pasayuban Krama Desa rawuhing kula warga pawonganya. Desane kamanggehang Bhuwana Agung, pawonganya sowang-sowang pinaka Bhuwana Alit.

Sotanin Bhuwana Agung desane wantah pawakan Bawa maurip, jangkep saha Tri Hita Karananya, luwire :

- ha. Parhyangan, sahaning kahyangan, panyiwian desa genah ngarcana Ida Hyang Parama Wisesa, maka jiwaan desane,
- na. Pawongan, krama saha warga desa maka sami pawakan Bayu Pramana (Tri Kaya) mawinan desane side molah maprawerti.
- ca. Palemahan, tanah kakuwuban desa, sinanggeh stula sariraning desane.

Adung patemon bhuwana kalih, larapan santa jagadhita, sinanggeh murdhaning prayojana pangriptaning Awig-awig Desa Pakraman ring sabha krama Desa Pakraman Susut.

Pamutus sabha inucap pinaka sepat siku-siku pamatut, wastu prasida prayojanan mami kabeh prasama anghidep muwah amagehaken kadi linging Awig-awig iki.

MAKA BANTANG AWIG-AWIG DESA PAKRAMAN SUSUT

MURDHAN – CITTA

WIDANG

PRATHAMA SARGAH : ARAN LAN WAWIDANGAN DESA ...	1
DWITYA SARGAH : PATITIS LAN PAMIKUKUH	1
TRITYA SARGAH : SUKERTA TATA PAKRAMAN.....	2
Palet 1 Indik Krama	2
Palet 2 Indik Prajuru Desa	6
Palet 3 Induk Kulul	9
Palet 4 Indik Paruman	10
Palet 5 Indik Druwen Desa	12
Palet 6 Sukerta Pamitegep	14
Kaping 1 Karang, tegal lan carik.....	14
Kaping 2 Pepayonan	15
Kaping 3 Wewangunan	17
Kaping 4 Wewalungan	17
Kaping 5 Bhaya.....	18
Kaping 6 Panyanggran Desa.....	20
CATHURTAS SARGAH : SUKERTA TATA AGAMA	
Palet 1 Indik Dewa Yadnya.....	21
Palet 2 Indik Resi Yadnya	26

Palet 3 Indik Pitra Yadnya.....	27
Palet 4 Indik Manusa Yadnya.....	35
Palet 5 Indik Bhuta Yadnya	36

PANCAMA SARGAH : SUKERTA TATA PAWONGAN

Palet 1 Indik Pawiwahan	38
Palet 2 Indik Nyapian.....	41
Palet 3 Indik Sentana	44
Palet 4 Indik Warisan.....	46

SAT SARGAH : WICARA LAN PAMIDANDA

Palet 1 Indik Wicara.....	50
Palet 2 Indik Pamidanda.....	51

SAPTAMA SARGAH : NGUWAH-NGUWAHIN AWIG-AWIG..

ASTAMA SARGAH : SAMAPTA.....

53

PRATHAMA SARGAH
ARAN LAN WAWIDANGAN DESA

Pawos 1

- (1) Desa Pakraman puniki mawaste Desa Pakraman Susut
- (2) Jebar kakuwub wawidangannya mawates nyatur :
 - ha. Sisih wetan ring tukad ayung
 - na. Sisih kulon ring Desa Pakraman Satung
 - ca. Sish lor ring Desa Pakraman Buahan
 - ra. Sisih kidul ring pecampuhan tukad ayung
- (3) Desa puniki kawangun antuk karang ayahan Desa lan karang gunakaya.

DWITYA SARGAH
PATITIS LAN PAMIKUKUH

Pawos 2

Desa Pakraman Susut ngamanggehang pamikukuh minakadi :
ha. Pancasila;
na. Undang-Undang Dasar 1945 pamekas Pasal 18;
ca. Perda Propinsi Bali No. 03 Tahun 2001;
ra. Tri Hita Karana manut sada cara Agama Hindu.

Pawos 3

Luwir Patitis Desa Pakraman Susut :

ha. Ngukuhang miwah ngrajegang Sang Hyang Agama;

na. Nginggilang tata Prawertine maagama;

ca. Ngerajegang kasukertaan Desa saha Pawongannya sakala lawan niskala.

TRITYA SARGAH

SUKERTA TATA PAKRAMAN

Palet 1

Indik Krama

Pawos 4

- (1) Sane kabawos Krama Desa inggih punika kulawarga sane maagama Hindu saha ngamong karang utawi jenek mapaumahan ring sawidangan desa.
- (2) Sajaba punika sinanggeh tamiyu, sane kabinayang dados kalih inggih punika sane maagama Hindu, miwah siwosan ring maagama Hindu.
- (3) Indik Tamiyu punika manut pararem.

Pawos 5

Krama Desa wenten 4 (petang) pawos, luwire :

ha. Krama ngarep, kula warga sane ngamong karang ayahan Desa;

na. Krama kamplengan/pangele kulawarga sane nenten ngamong karang nanging sampun mawiwaha;

- ca. Krama balu, krama sane katinggal seda olih lanang utawi istri nyane,
utawi sangkaning nyapihan.
- ra. Krama-tapukan, kulawarga manut aksara ha ring ajeng sakewanten
durung antes ngayah utawi salami kanton masekolah malarapan ilikita
pastika saking sekolahnya, manut pararem.

Pawos 6

Ngawit dados Krama Desa :

- ha. Sangkaning ngamong karang, jenek mapaumahan utawi manut pararem;
na. Mawiwit pawiwahan.

Pawos 7

Panamaya tedun makrama Desa :

- ha. Nyabran sasih kasanga saha majalaran antuk paigum saderengnya arep
ring Krama sane ngamong karang ayahan Desa;
na. Jenek mapaumahan, manut pararem.

Pawos 8

Sahanan Krama Desa keni tategenan luwire :

- ha. Ayah ngarep, mapiteges urunan miwah ayahan mamungkul;
na. Ayah kamplengan/pangele, mapiteges ayahan mamungkul miwah
urunan separo saking krama ngarep;

ca. Prade rikalaning ngayah wenten sinalih tunggil krama matilar tanpa sadok sadereng puput karya, wenang krama inucap keni pamidanda manut pararem, tinggal tarung kawastanin.

Pawos 9

Swadharman Krama, sewosan ring tetegenan, luwire :

ha. Tinut saturut ring sadaging Awig-awig, pararem lan paswasran Desa;

na. Tan maren ngutsahayang mangda Desane mrasidhayang nyujur manut patitis;

ca. Tinut saturut ring Guru Wisesa.

Pawos 10

Swadharman Tamiyu, luwire :

ha. Tinut saturut ring yasa kartin Desane;

na. Tan piwal ring sadaging Awig-awig, pararem lan paswaran Desa;

ca. Nyadokang raga ring Prajuru arahina sasampun jumenek malarapan antuk ilikita pastika saking desane utawi sang ngawawenang;

ra. Yan tan tinut pacang kairid (tan kadadosang jumenek ring Desa).

Pawos 11

Pilih-olihan Krama :

ha. Polih pasayuban sakala niskala tur kabawosin saha katiwakin pamutus sahanan wicaranya;

- na. Nyarengin paruman tur wenang sareng mastikayang pamutus;
ca. Kadadosang madeg Prajuru, manut pararem.

Pawos 12

Krama Desa kadadosang :

ha. Mapoangkid utawi tan tedun :

- 1) rikala mapawangun ngeraabin, mayadnya, matepetin rare sungkan, kaluasan, lan siosan punika;
- 2) kengin tempo wantah apisan, sajawanin wenten wak-wakan saking Prajuru Desa.

na. Nyada, mapiteges ngamademang ayah, risampun mayusa 69 (enem dasa lima) warsa tur tan dados nyuksukin, sang nyada mangda nyantenang panyeledihi;

ca. Nyade, utawi nyuksukin, sane kawenangan risampun manggeh deha-teruna utawi mrasidayang nganutin krama;

ra. Ngentos ayah-ayahan antuk arta berana saantukan kapialang, menawi kajudi olih sang mawangrat utawi sangkaning pariindikan siwos manut pararem, ngoot kawastanin.

Pawos 13

Wusan dados Krama, luwire :

ha. Sangkaning :

- 1) Pinunas ngeraga, menawi kesah kadura Desa utawi ngalangkungi sagara;
- 2) Kanorayang, duaning sampun tan prasida ngesehin solah maprawerti satata nguwig pamargin Awig-awig.

na. Sang wusan makrama :

- 1) Patut ngaturang karang ayahan ke Desa, prade karang punika karang Desa;
- 2) Tan polih pah-pahan saking padruweyan Desa;
- 3) Tan polih pasayuban sajronin ala ayu.
- 4) Sang wusan makrama Desa prade mawali malih patut nawur saurah arih tetegenan krama manut pararem.

ca. Sang wusan sangkanin kanorayang, prade mawali malih patut :

- 1) muntasang saluwir pamidanda utawi tategenan sane ngranayang kanorayang;
- 2) nunas geng pangampura ring paruman desa maduluran panyangaskara panyapsap kaiwangan duwaning nguak pasubaya pecak.

Palet 2
Prajuru Desa
Pawos 14

(1) Desa Pakraman Susut kaenter olih Bendesa

(2) Bendesa patut :

ha. Mawiwit saking krama wed kajangkepiin antuk :

- 1) Uning ring aksara latin utawi Bali;
- 2) Uning ring tata titining mawa desa;
- 3) Uning ring pariindik Agama lan Adat;
- 4) Lascarya ngayah tur madruwe parilaksana sane rahayu.

na. Kaadegang malarapan antuk kacatri olih Paruman Desa nyambran 5 (limang) warsa, sejawaning wenten pariindik tiyos, tur dados kacatri malih;

ca. Maduluran Dewa saksi ring Pura Bale Agung.

Pawos 15

(1) Bendesa kasanggra olih :

ha. patajuh utawi Pangliman pinaka wakilnya;

na. Patengen utawi juru raksa pinaka pangamong druwen Desa;

ca. Kasinoman pinaka juru arah.

(2) Kasinoman akehnya manut kawigunan saha magilir nyabran ngasasih

(3) Sajeroning ngenterang kasukertan niskala, Bendesa mingsinggihang Pamangku Kahyangan Desa utawi sang Rumaga Sulinggih.

Pawos 16

(1) Swadharmaning Bendesa luwire :

ra. Ngenterang pamargin sadaging Awig-awig miwah pararem Desa;

- aa. Nuntun tur ngenterang krama rawuhing warga Desa;
 - ca. Mawosin kalih niwakang pamutus arep ring wicara warga Desa;
 - ra. Maka dutta Desa matemuang bawos ring sapo sira ugi.
- (2) Prade Prajuru iwang palaksana keni pamidanda nikel ring kaiwangan soang-soang krama, tur dados kararyanang manut pararem

Pawos 17

Patias utawi olih-olihan Prajuru Desa, luwire :

- aa. Luput rerampen lan papeson;
- aa. Polih tanding tengah;
- aa. Upon pacatu/palaba carik/tegal;
- aa. Patias sewosan manut pararem.

Pawos 18

(1) Prajuru Desa kagentosin riantukan :

- ha. Seda;
- na. Kanorayang dwaning iwang pamargi utawi nilar sesana;
- ca. Wit saking pakayun utawi pinunas ngaraga;
- ra. Sampun panemaya.

(2) Nganorayang utawi ngentosin prajuru Desa patut sajeroning paruman tur kaingkupin olih Krama Desa.

Palet 3

Indik Kulkul

Pawos 19

(1) Kulkul ring Desa luwire :

ha. Kulkul ring Kahyangan;

na. Kulkul Desa;

ca. Kulkul Sekaa-sekaa.

(2) Tabuh tatepakan kulkul :

ha. Ring Kahyangan : nungtit/sisih asih, tengeran wenten yadnya/
upacara;

na. Ring Desa :

1) Bulus, tengeran wenten bhaya;

2) Atulud lambat, tengeran tedun ngayah utawi wenten karya;

3) Atulud lambat kawewehin 5 (limang) kalentungan, tengeran
ngawandeang karya;

4) 7 (pitung) klentungan, tengeran wenten pawiwahan/pakerab
kambean;

5) 3 (tigang) klentungan, tengeran wenten krama/warga kelayu-
sekarang;

Pawos 20

- (1) Kulkul Desa tan wenang katepak yening tan sangkaning pituduh Prajuru Desa.
- (2) Sang nepak tan sangkaning pituduh patut digelis atur supeksa maka buatan panepake, yan tan sapunika wenang sang mamurug kadanda manut pararem.
- (3) Kulkul sekaa-sekaa samaliha kulkul pondokan-pondokan tan kalugra nyawerin (matehin) sukat utawi tengeran kulkul Desa sajawaning tengeran bhaya, prade mamurug taler kadanda manut pararem.

Palet 4

Indik Paruman

Pawos 21

- (1) Paruman utawi sangkepan ring Desa Pakraman Susut wenten :
 - ha. Paruman Desa kawentenan :
 - 1) Nyabran ngasasih, maka cihna tanpa arah-arrah, dwaning sampun tetep panamaya manut parerem, nemonin rahina Redite Umanis.
 - 2) Napkala (padgata kala) maka jalaran arah-arrah manut tetujon.
 - na. Sangkepan Prajuru Desa, kawentenang manut wiguna;
 - ca. Paruman sekaa-sekaa manut pabuat.
- (2) Peparuman Desa madudonan sekadi ring sor :

- ha. Prasida lumaksana risampun katedunin olih sang patut ngamiletin,
kamanggala antuk tengeran kulkul miwah mabusana Adat Madya,
saha tan kalugra makta gegawan sakaluire. Tan maren ngarcana
ring Ida Bagawan Panyarikan maka sarana Whidi widana cane;
- na. Maka sarana janggi, pangawit kelaksanayang panyacak sep-sepan
saha riwusannya nyacak, ngetang dadosan gung alit manut pararem;
- ca. Tan kelugra ngawetuang suwara gora utawi byota, yan wenten
asapunika keni pamindanda beya pacamil kadi dandaning nguman-
uman ring sabha;
- ra. Pamutus bebawos beriuk sapanggul (ingkup) punika
kamanggehang;
- (3) Prade pidaging paruman tan kainggkupin mangda Prajuru Desa
ngilikang bebawos, saha pamutusnya mangde kararemin olih Krama
Desa, bilih tan prasida kasungkemin jantos ping tiga Prajuru wenang
nunas bawos ring sang Ngawa wenang.

Pawos 22

- (1) Sajeroning paruman Desa, Bendesa patut (nyobyahang) pamargin
ngenterang Desa, pamekas nganinin indik :
- ha. munjuk lungsuring Pakraman saha ayah-ayahan, sulur arta brana
druwen Desa;
- na. rarincikan prajuru nganinin usaha Desa kapungkur;

- (2) Pamutus paruman Desa sinanggeh pararem maka pamitegep daging awig-awig.

Pawos 23

- (1) Sangkepan Prajuru Desa kawenangan wantah ngarincikang pangerencana usaha Desa kapungkur.
- (2) Sangkepan Prajuru Desa tan kawenang ngawedalang tategenan ring Krama sedereng kaingkupin olih Krama Desa ring paruman.
- (3) Pamutus sangkepan Prajuru Desa ngawetuang pasuwara, maka pidaging pituduh sang ngawawenang utawi ngonekang pecak pararem Krama Desa.

Palet 5

Indik Druwen Desa

Pawos 24

Padruwen Desa Pakraman Susut sekadi ring sor :

ha. Kahyangan Desa luwire :

- 1) Kahyangan tiga : Pura Desa/Balai Agung, Pura Puseh, Pura Dalem lan Prajapati;
- 2) Pura Catur Bhwana;
- 3) Pura Tanggluk.

na. Wantilan Desa;

ca. Tanah tegalan (manut ilikita);

ra. Karang ayahan Desa, munjuk lungsur saking 63 (enem dase tiga)

karang;

ka. Setra,;

da. Palaba Pura, carik/tegal (manut ilikita);

ra. Lelangunan, mekadi tetabuhan lan ilen-ilen padruwen Desa luwire :

1) Gong

2) Ilen-ilen wali pura : Rejang, Pendet,.....

3) Muah padruwean tiyosan.

sa. Nyasa, sasanthi;

wa. Lembaga Perkreditan Desa (LPD).

Pawos 25

Pioli-pioli Desa Pakraman Susut luwire :

ha. Pioli-pioli saking palabe Pura;

na. Urunan Krama Desa Pakraman;

ca. Paica saking Guru Wisesa;

ra. Paica tiyosan, sane patut;

ka. Usaha Desa minekadi LPD.

Pawos 26 ,

(1) Prajuru Desa wenang ngetangang pamupon laba pura lan sapanunggalan druwen Desa.

Penting

- (2) Pikolih lan pamuponnya kaanggen prabeya piodalan saha wewangunan ring pura miwah anggen kabuatan Desa Pakraman.
- (3) Nyabran pasangkepan Desa, Prajuru pangamong druwe Desa nguningayang perindik munjuk lungsuring praduwean ring Krama Desa.
- (4) Saka luwiring druwe Desa patut wenten ilikitanyane.
- (5) Tan kalugra ngadol utawi ngesahang padruweyan Desa yan tan kasungkemin olih Krama Desa ring paruman.

Palet 6

Sukertan Pamitegep

Kaping 1

Karang, Tegal lan Carik

Pawos 27

- (1) Krama Desa pangamong karang Desa utawi karang gunakaya patut ngawatesin karang inucap antuk tembok utawi pagehan mangda pakantenannya asri.
- (2) Wates sisi kaler miwah kangin patut kakaryaning olih sang ngamong karang ayahan inucap, sane mawasta gegaleng kaluan. Sajawaning tanah pacatu, tegal, carik utawi tanah padruweyan ngaraga, sane kapiara watese sisi kelod miwah kauh utawi manut dresta reh punika mawasta gegaleng kateben.

- (3) Prade karasayang pagehan/turus inucap ngalikadin, yan pada arsa penyandinge, kengin watese nganggen pinget kewanten, kasaksinin olih Prajuru Desa utawi prasihna pal saking sang ngawawenang.
- (4) Prade wenten karang kabebeng/embet mangda kautsahayang wenten pamarginya, manut paigum lan pararem.

Pawos 28

- (1) Sinalih tunggil Krama Desa tan kalugra :
 - ha. Ngalah-alah margi, tegal ayahan Desa, karang Desa lan sapanunggalanya;
 - na. Ngalah-alah tanah linggih khayangan, tegak setra, lan sekancan linggih sinanggeh suci.;
- (2) Prade wenten sekadi ring ajeng, sang ngalah-alah wenang ngawaliang tanah inucap saha keni pamidanda manut pararem kadulurin upakara prade ngalah-alah tanah suci.

Kaping 2

P e p a y o n a n

Pawos 29

- (1) Ngawit nandur pepayonan tanem tuwuh patut adepa agung (2 meter) ngajeroang saking wates, prade jantos ngaliwat wates wenang kasepat gantungin.

- (2) Yening wenten tatanduran ngungkulin, samaliha mawastu mayanin kapisaga patut kawara antuk paiguman ping ajeng mangda prasida sang nruwenang wit ngarebah utawi notor.
- (3) Prade sampun kawara taler tan wenten usaha sang nruwenang wit, sang rumasa katetehan/kajerihan wenang masadok ring prajuru, tur risampun kaparitas kalugra mademang wit inucap, sakewanten patin pepayonan patut katawur manut pangeloika sane nepasin.
- (4) Sang keni pamidanda panyangaskara saha prabeya manut pararem arep ring wewangunan sang karubuhin, luwire :
ha. Sang nruwenang wit sinanggeh mayanin, prade pungkut ngarubuhin wewangunan krama tiyos;
na. Sang notor, munggul utawi ngarebah taru tur ngrarubuhin krama tiyos.
- (5) Prade wenten wit mentik sajronin wates patut kapademang, mangda tan ngranayang wicara. Prade sampun ageng kapademang, wit punika pinara tiga :
ha. Apah tiga katur ring sang nruwenang wit,
na. Apah tiga katur ring sang penyandingnya,
ca. Apah tiga katur ring Desa Pakraman.
- (6) Krama Desa patut ngamanggehang kawerdian tanem tuwuh sane ngawinang Desane asri.

Kaping 3

Wewangunan

Pawos 30

(1) Nyambran ngwangun patut :

ha. Masadok ring Prajuru, ping ajeng prade wewangunan nganinin wates;

na. Ngangge sukat asta bhumi miwah gagulak asta kosala-kosali,
- sanistane manut ring patitis niskala;

ca. Tan nyayubin kapisaga;

ra. Tan dados ngembahang toya wit saking jempeng/WC, miwah belengbeng/bada ka pisaga.

(2) Prade wewangunan jantos nyayubin bilih-bilih temboke ring telengin wates, riampun kawara tur kasadokang ring Prajuru, wenang kadanda manut pararem saha tembok inucap kagubar utawi sanistane mangda kakaryanang abangan.

Kaping 4

Wewalungan

Pawos 31

(1) Warga Desa sane mamiara wewalungan patut sayaga nitenin negul/nglogor mangda tan ngarusak karang utawi pabianan Krama sewos, bilih-bilih jantos ngranjing ngaletihin Kahyangan.

- (2) Prade wenten wewalungan malumbar utawi ngeleb ngarusak pakarangan/pabianan Krama sawos, risampun kawara dados kataban tur kadanda ngawaliang wit sane karusak saha nawur panebas papiaran tetabanan, manut pangeloikan Prajuru Desa.
- (3) Prade jantos ngaletihin linggih suci, minakadi Pamrajan, risampun kaparitas olih Prajuru wenang sang nruwenang kadanda mabuhu agung (caru eka sata, maduluran tebesan prayascita durmanggala), prade ngaletihin Kahyangan Desa utawi Pamaksan, wenang nyaronin antuk Panca sata makerep itik belang kalung.
- (4) Krama Desa patut nyanggra wewalungan miwah sarwa prani, tan kapatutang ngamademang paksi, nuba ulam, miwah sane sewosan. Prade wenten melaksana sakadi punika keni pamidanda manut pararem tur kaaturang ring sang Ngawawenang.

Kaping 5

B h a y a

Pawos 32

- (1) Pariindik bhaya, luwire : jiwa bhaya, artha bhaya (kapandungan), dura cara ring Agama.
- (2) Sang Manggihin kahanan jiwa bhaya, patut nepak kulkul bulus mapitulung manut pawos 19 (2).

- (3) Prade ring Desa kahanan jiwa bhaya, patut Desane ngaturtang Bhuta Yadnya, tur sang mayanin kaaturang ring Sang Ngawawenang.
- (4) Prade wenten jatma mamisuh utawi nguman-uman jadama tiyos, kakenanin pamidanda beya pacamil maduluran tebasan prayascita.
- (5) Yaning wenten jatma majengilan ring bale Banjar, ring Pura, utawi ring genah kasinggeh suci, kani pamidanda manut pararem, maduluran payangaskara prade sang majengilan kantos ngamedalang rah.

Pawos 33

- (1) Sang manggihin kehanan artha bhaya (kamalingan), patut ngulkul mapitulung manut ring pawos 19 (2) utawi sang kamalingan atur supekta ring Prajuru Desa sane pacang nimbangin utawi nandanin manut pararem, saha maweweh panyangaskara prade wenten jatma ngamaling barang sinanggeh suci.
- (2) Pratingkahe mapialon ring dusta kabawos saruron, prade wenten jatma manggihin maling tan nyadokang ring Prajuru jantos jatma tiyos ngaduang, patut kadanda kadi dandaning maling, sakweh pangargan wit manut cacakan Desa, tur prade jantos ping tiga malaksana asapunika wenang kasukserah rong sang Ngawawenang.
- (3) Prade wenten jatma ngarereh reramon, minakadi daun kelapa, ron miwah sane sewosan tanpa sadok ring sang nruwenang wit, prade kacunduk (katara) patut kadanda kadi dandaning maling.

- (4) Yening wenten jatma ngrajing kapakubon wiadin pakarangan jatma tiyos rikala suwung, mawastu sang madruwe karang kaicahan, wenang jatma inucap katuwekang antuk madewa saksi ring Pura Bale Agung.
- (5) Mangda tan katuwekang manut sekadi ring ajeng, asing-asing ngranjing kapakubon jatma tiyos patut :
 - ha. Matengeran suwara (makaukan);
 - na. Nyantos sang nruwenang karang rauh utawi masadok ring pangapit pinik tampek, maka buatan pangaranjinge;
 - ca. Pamedal karangnya kadagingin sawen, maka cihna pangarah rikala suwung.

Kaping 6
Panyanggran Desa
Pawos 34

Krama Desa rikala ngawentenang karya suka-duka patut kasanggra olih Desa luire :

- ha. Prade ngawangun Pitra Yadnya utawi Manusa Yadnya, manut pinunas sang mayadnya;
- na. Pangarombo utawi gotong royong krama jantos ping tiga, langkungan ring punika patut katuran pangu;
- ca. Pangu rikala Pitra Yadnya manut abot dangan Yadnya, prade saking semengan ngantos wengi katuran Pangu ping kalih;
- ra. Pangarombo tiyosan manut pararem.

CATHURTAS SARGAH
SUKERTA TATA AGAMA

Palet 1

Indik Dewa Yadnya

Pawos 35

- 1) Kahyangan Panyiwian ring sawidangan Desa Pakraman Susut luwire :
- na. Kahyangan Tiga Pura Desa/Bale Agung, Puseh miwah pura Dalem lan Prajapati;
 - na. Pura Catur Bhwana;
 - ca. Pura Tangluk.
- 2) Rahina Piodalan ring soang-soang kahyangan inucap, kadi ring sor ;
- na. Ring Kahyangan Tiga luwire;
 - 1) Pura Desa/Bale Agung, rikala purnama sasih kapat.
 - 2) Pura Puseh, rikala purnama sasih kapat.
 - 3) Pura Dalem, rikala Buda Umanis Wara Julungwangi.
 - na. Pura Prajapati rikala Buda Umanis Wara Julungwangi;
 - ca. Pura Catur Bhwana, rikala Soma Wage Wara Kulantir;
 - ra. Pura Tangluk, rikala purnama sisah kadasa.
- 3) Pangaci ring Pura inucap manut kecap sastra Agama, saha kalaksanayang nista, madia, utama manut kawentenan lan pararem.
- 4) Soang-soang Pura inucap kaamong olih Desa Pakraman Susut.

Pawos 36

(1) Ring soang-soang Pura inucap patut kaadegang Pemangku ;

(2) Ngadegang Pemangku manut dudonan ;

ha. Nyanjan utawi masemurang, soang-soang mapiteges mapinunas
ring ajeng Pura wiadin kadura Desa manawi ring balian konteng,
lan sapanunggilannya;

na. Turunan utawi waris;

ca. Kacatri olih Krama Desa;

(3) Tan kawenang adegang Pamangku luwire ;

ha. Cendangga makadi peceng, perot, cungh lan sapanunggilan ipun;

na. Sang sapisira ugi sane tan kapatutang manut pararem;

ca. Sakit ila, ayan, buduh wiadin edan;

ra. Sane tan madrebe kasucian urip.

(4) Prabia Kapamangkuan ;

ha. Adikasa Widhi (ngawintenin) lanang istri kamedalin saha
kalaksanayang olih sang ngadegan, makadi krama Desa utawi
pangempon Pura soang-soang;

na. Mapitra Yadnya riwekas lanang miwah istri patut kasungkemin olih
Krama Desa utawi pangemong, sanistane Brahmaprayascita
panyanggrane manut pararem, prade Yadnya inucap kalaksanayang
oliw warga sira pamangku;

ca. Sinalih tunggil krama yan wenten ngipik-ipik sapari polah pamangku, nanging pamangku tan sapunika pari polahnya kadi sane kaipik-ipik, wenang jadma inucap kasisipang nyuciang pamangku, manut pararem.

5) Pamangku patut ngamanggehang sasananing Pamangku luire;

ha. Ambek Dharma sadhu;

na. Asewaka Dharma, makadang sastra utama;

ca. Tan parek ring naya dustha;

ra. Tan atayub ring tarub camara yudha;

ka. Tan manjing ring umah wong banija karma;

da. Tan manjing umah wong drati krama;

ta. Tan wenang ajajuden;

sa. Tan anginum asing angawe mada;

wa. Tan pati pikul-pikulan;

la. Tan salah suluh;

ma. Tan wenang anayub upadrawaning cor, yan mawiyawahara teka wenang adewa saksi;

ga. Tan griganing wong akweh;

ba. Tan keneng cuntakaning wong len, sawawinain kulawarganya tunggil natah, utawi pasiwaning manut dresta;

6) Prade mamurung, wenang Pemangku nyepuhin raga kesaksinin olih Prajuru Desa.

- (7) Yan pacang ngawalat rabi wenang ngaturang rumuhun pawintenannya, ring pura genahnya madeg pamangku nguni, tembenya wawu wenang ngawalat rabi, riwus upacaranya wenang ngawana Waça salaminya atahun, wus punika wawu mawinten lakibi kadi pawintenannya nguni;

Pawos 37

Swadharma Pamangku Luwire :

- na. Ngenterang upacara piodalan ring Kahyangan utawi ring soang-soang pakubon krama;
- na. Prade salah sinunggil Pamangku kapialang utawi cuntaka, kengin nguntap Pamangku kahyangan desa tiosan utawi nuwur sang sulinggih;
- na. Samaliha yan sampun pamangku ngayah ring Pura kancit wenten kulawarganya seda. Pamangku inucap tan keneng cuntaka sakewanten Pamangku tan budal salami piodalan.

Pawos 38

Patias utawi olih-olihan pamangku luwire;

- na. Panyolasan miwah sarin canang ring soang-soang pakubon krama Desa;
- na. Upon palaba carik miwah tegal manut pararem;
- na. Luput pakaryan, rerampen/reramon, lan padagingan (luput manuk);
- na. Patias sewosan manut perarem.

Pawos 39

ma Pamangku kagentosin riantukan;

na Seda;

na Pinunas ngaraga, sangkanin kageringan lan sapanunggalannya;

ca Prade pamangku kauwusang sangkaning malaksana tan patut keni pamidanda marut pararem saha ngawaliang prabiya pawintenannya pecak.

Pawos 40

Kawakertan Kahyangan kadi ring sor;

na Tan kalugra ngaranjing kapura luwire;

1) Sang katiben cuntaka makadi sebel ring raga utawi kapademan;

2) Makta sahanan barang sinaggeh ngaletihin;

3) Sato Agung, sajawaning rikala mapapada;

4) Mabusana sane tan patut kadi tatacaraning ngaranjing kapura;

5) Sadereng polih wak-wakan (pituduh) Prajuru Desa.

na Pratingkahe tan wenang ring Pura

1) Masumpah (cor) sajiwaning pituduh Prajuru Desa;

2) Wak parusya/wak capala, makobetan, masasenengan, makolem dados asiki lanang wadon, mabacin, mawarih, macecepin rare, majaljal/majengilan, nyangsang busana, menahin pasungan

saantukan punika rikala majajahitan patut ngelung busung macingor lidinya;

3) Mungguh tedun palinggih sawawaning pituduh Prajuru.

ca. Sang mamurug kecap ring ajeng keni pamidanda pamrayascita sapatunya.

Pawos 41

- (1) Yan wenten jadma karawuhan ring Pura, dados kapintonin prade rumasa kasumangsayan, yan tan wiakti, jatma inucap kasisipang manut pararem.
- (2) Prade kahyangan kahanan durmanggala, minakadi keni bhaya, Pamangku/sang manggihin, patut digelis nyadokang ring Prajuru mangda marumang Krama Desa tur ngawentenang pamrayascitta sapatutnya.

Palet 2

Indik Resi Yadnya

Pawos 42

- (1) Sang pacang madeg Pandita utawi Pinandita minakadi Balian Konteng, Kubayan, Dalang, sakaluwiring sane jagi ngenterang yadnya patut masadok ring Prajuru Desa utawi Parisada Hindu Dharma Indonesia.

- ❑ Prajuru Desa patut ngawas nitenin tur wenang ngalangin prade wenten kahecinan nyasarring kakecap miwah drestane, tur sareng nyaksinin upacaraanya saha nyobyahang ring paruman Desa tegap rawuhing wates kawenangannya ngenterang yadnya.
- ❑ Krama Desa patut ngaturang ayah sapamadeg miwah ring pangelepas Sang Sulinggih riwekas katuntun olih prajuru Desa.

Pawos 43

- ❑ Sang Sulinggih lan Pamangku patut ngariyining muputang ring wawidangan, Desa Pakraman Susut sasampun punika wawu muputang Yadnya kajebar tios Desa utawi kadure Desa.
- ❑ Krama Desa sami patut sareng ngawas nitenin katuntun olih Prajuru, mangda sahanan Yadnya sane kawentenang kaicen pamuput olih padanda utawi pinandita manut kawenanganya soang-soang.

Palet 3

Indik Pitra Yadnya

Pawos 44

- ❑ Pamargin Pitra Yadnya madudonan manut sekadi ring sor :
- ❑ Pangupakaran Sang kalayu sekaran;
- ❑ Antuk mendem utawi ngeseng, maka cihna pakinsan ring ibu Pratiwi utawi ring geni selami nuptupang prabeya;

2) Atiwa-atiwa (upakara pangabenan/palebón).

- na. Upacara upakara Pitra Yadnya riwusan pangabenan ngraris munggah daun bingin (ngaroras) manut dudonan Atma Wedana;

Pawos 45

Swadharmaning lan tategenan prade wenten sinalih tunggil Krama kalayu sekaran ;

- na. Sang kaduhkitan patut ;

- 1) Nyadokang ring Bendesa tur nunas tatimbangan ring kawentenanya;
- 2) Ngaturin Desa ngerombo makarya eteh-ete sawa saha ngater kasetra tur katuran panyembrama canang sesida-sidaan.

- na. Swadharmaning Desa ;

- 1) Bendesa maritatas pamargin sang kaduhkitan, napike pacang kapendem, makingsan riyin utawi lantur kaabenang;
- 2) Prade kapendem, raris kaswarayang kulkul pamitahu manut pawos 19 (2) olih Bendesa utawi wakilnya.
- 3) Panyanggran Desa salanturnyane ;
 - Soang-soang Krama Desa nedunang patus beras, kelapa, miwah manut pararemi.
 - Ngarombo ngarvanin eteh-ete sawa, kasarengin olih Krama sane rawuh ngarombo.
 - Sami Krama Desa nganter kasetra jantos puput pamendemané.

ma Tan kengin ngalelet langkungan ring 3 (tiga) rahina, tur patut polih pagebagan manut paetengan Prajuru Desa.

ma Tan kalugra nginepang bangbang miwah mendem rikala :

semut sadulur;

kalagotongan;

Pesah;

kliwon, kajeng kliwon;

Soma, Umanis Taulu;

Was panganten;

Ingkel wong;

Prawani, Purnama, Tilem;

Rerahinan jagat.

ma Prade wenten kalayu sekaran rikala piodalan, kengin mendem tanpa sadok, tan nyuwarayang kentongan/kulkul tur mamargi wengi/sasiliban.

ma Pamargin pamendeman utawi palebonan mangda nganutin sastra Agama lan Dresta.

Pawos 46

ma Sane kasinanggeh kacuntaka sakadi ring sor :

ma Cuntaka antuk kalayu sekaran;

ma Cuntaka antuk ngeraja swala;

ma Cuntaka antuk ngembasang putra;

- ra. Cuntaka antuk karuron;
- ka. Cuntaka antuk sakit ila, buduh;
- da. Cuntaka antuk pawiwahan;
- ta. Cantuka antuk gamia gamana;
- sa. Cantuka antuk salah timpal;
- wa. Cantuka antuk yening wenten anak istri mobot nenten
kaupakarayang pabiukawonan miwah pawidiwidana;
- la. Cuntaka antuk mamitra ngalang;
- ma. Cuntaka antuk yaning wenten anak istri ngamedalang putra
sadurunge maupekara pabiukaonan miwah pawidiwidana;
- ga. Cuntaka antuk Sad Tatayi.

☞ Sengker cuntaka manut kawentenannya :

- ha. Cuntaka kalayu sekaran, cuntakanya kaanutang ring loka dresta
Desa Pakraman;
- ma. Cuntaka ngeraja swala, 3 rahina ngawit saking ngeraja swala utawi
salamining ngeraja swala;
- ca. Cuntaka ngembas putra, 42 rahina (abulan pitung rahina) ngawit
saking putrane embas, utawi ngantos sampun kaupakarayang
makakambuhan lan maperayascita manut sastra agama, lanang
wiadin istri;
- ra. Cuntaka karuron, cuntakanya abulan pitung rahina (42 rahina) tur
sampun matirta pamrayascita;

- ka. Cuntaka sakil ila, buduh/edan, cuntakanya manut ilikita pastika saking Sang Ngawawenang/sang nambanin miwah sampun mrayascita raga;
- da. Cuntaka pawiwahan, cuntakanya ngantos sasampune matirta pabiukaonan;
- ta. Cuntaka gamia gamana, cuntakanya ngantos sasampune kapalasang/kasapihang tur sampun kawentenang pamrayascita raga miwah pamrayascita Desa Pakraman/Kahyangan;
- sa. Cuntaka salah timpal kapuputang manut ring sastra Agama Hindu;
- wa. Cuntaka anak istri mobot nenten kawentenan upakara pabiukaonan, cuntakanya ngantos kawentenan upakara pabiukaonan;
- la. Cuntaka mamitra ngalang, cuntakanya ngantos kawentenang upakara pabiukaonan;
- ma. Ngembasang putra nenten kawentenang upakara pabiukaonan miwah pawidiwidana, cuntakanya ngantos wenten sane mameras sang putra, lan sampun kawentenan upakara manut ring sastra Agama Hindu;
- ga. Cuntaka Sad Tatayi, cuntakanya ngantos sampun maprayascita raga tur nenten pisan dados ngamunggahang upakara padwijati.
- ga. Cuntaka kalayu sekaraan/kapademan :
- ba. Kapendem cuntakanya :

1) Cuntaka/sebel kadesa ngantos 3 rahina riwusnya mendem/manut drestha utawi sasampun polih pamrayascita.

2) Kaluwargania sajeroning pakarangan ngantos 42 rahina/manut dresta.

na. Kaabenang cuntakanya :

Sang nyambut karya Pitra Yadnya cuntakanya ngawit saking nyambut padewasan karya ngantos wusan mapegat kalanturang malih tigang rahina.

4) Sane katiben cuntaka luwire :

ha. Kalayu sekaran sane kacuntaka :

1) Sang sane kalayu sekaran;

2) Kulawarganya;

3) Desa.

na. Ngeraja swala sane kacuntaka :

■ Sang sane ngarajaswala

ca. Ngembas putra sane kacuntaka :

■ Kulawarganya sane ngembasang putra lanang wiadin istri.

ra. Pawiwahan sane kacuntaka :

■ Sang sane ngalaksanayang pawiwahan lanang wiadin istri.

ka. Sakit ila/buduh, sane kacuntaka raganya dewek.

da. Karuron sane kacuntaka :

■ kulawarganya lanang wiadin istri.

ta. Gamia gamana sane kacuntaka :

- 1) Sang sane ngalaksanayang gamia gamana;
- 2) Desa Pakraman.

sa. Salah timpal sane kacuntaka :

- 1) Sang sane malaksana salah timpal;
- 2) Kulawarganya;
- 3) Desa Pakraman.

wa. Anak sitri mobot nenten kawentenang upacara pabiukaonan sane kacuntaka :

- Sane meraga istri (sane mobot)

la. Mamitra ngalang sane kacuntaka :

- Sane ngalaksanayang mamitra ngalang.

ma. Ngembas putra nenten kawentenang upakara pabiukaonan miwah upakara pawidi-widana sane kacuntaka :

- 1) Sang sane ngembas putra;
- 2) Putra sane embas.

ga. Sad Tatayi, sane kacuntaka :

- Sang melaksana Sad Tatayi.

5) Tan keneng cuntaka, luwire :

- 1) Sang sulinggih lan Pamangku Kahyangan tiga;
- 2) Rikala piodalan risampun ngalang sasih/ngalang tengah.

Pawos 47

- (1) Attiwa-tiwa (pangabenan) kalaksanayang antuk :
- ha. Sawa prateka, pangabenan mawatang sawa;
 - na. Sawa resi, pangabenan mawatang antuk sawa kresyan;
 - ca. Suwasta, pangabenan mawatang sawa sane tan kakeniang, kagentos antuk lafang utawi toya.
- (2) Panemayan pangabenan wenten kalih pawos :
- ha. Ngaben dadakan/bah bangun manut pararem;
 - na. Ngaben ngamasa (nyabran 5 warsa).
- (3) Dudonan pangabenan ngawit saking ngagah (seda), ngeseng ngantos pangiriman utawi nganyut.

Pawos 48

- (1) Peputusan pangabenan wenten kalih pawos :
- ha. Ngaben ngemasa luwire : beras, ayam, kelapa, gesing, papah jaka kelangsah miwah sane sewosan manut pararem.
 - na. Ngaben dadakan pateh sekadi patus seda kapendem.
- (2) Pangingune ring krama Desa ngawit ngayah manut abot dangan kehanan karya.

Palet 4

Indik Manusa Yadnya

Pawos 49

- Manusa Yadnya inggih punika upacara-upacara dharmaning kahuripan manusa, ngawit sakeng patemoning kama bang kalawan kama petak sejeroning garba ngantos kalayu sekaran riwekas.
- Upacara ring ajeng madudonan sekadi ring sor :
- ha. magedong-gedongan duk pengerempinian ibiang;
 - ma. duk sang karmereka medal;
 - ca. kepus odel;
 - ra. roras rahina;
 - ka. tutug kambuhan (42 rahina);
 - da. nigang sasihin (3 sasih);
 - ta. pewetuan/otonan/odalan (6 sasih);
 - sa. tutug kelih (ngeraja swala wadone, ngembakin langange);
 - wa. Matatah/mapandes;
 - la. Mawiwaha;
 - ma. Mawinten;
- Upacara-upacara inucap nista, media, utama manut sastra Agama Hindu lan dresta.

Palet 5

Indik Bhuta Yadnya

Pawos 50

- Bhuta Yadnya inggih punika upacara-upacara byakala ring Pratiwi lan Kahyangan, Sarwa prani saha upacara-upacara ring babuthan miwah ring piranti sewosan.
- Upacara pabyakala ring sarwa prani, sarwa tumuwuh muwang piranti tuire ;
- ha. Ring sarwa lelandep rikala Saniscara Kliwon wara Landep;
 - na. Ring sarwa tumuwuh lan piranti rikala Saniscara Kliwon wara Wariga;
 - ca. Ring Sarwa syandana/wahana rikala Saniscara Kliwon wara Kuningan;
 - ra. Ring sarwa lelanguan rikala Saniscara Kliwon wara Krulut;
 - ka. Ring sarwa ingon-ingon/wewalungan rikala Saniscara Kliwon wara Uye;
 - da. Ring sarwa ringgit, ukir-ukiran rikala Saniscara Kliwon wara Wayang;
 - ta. Upacara pakala-kalan manusa manut widana, kabawos pabyakala;
- Upacara pabyakala ring Pratiwi, Kahyangan lan Babuthan kawastaning macaru.

- 4) Pacaruan inucap ring ajeng nista, madia, utama, manut wiguna kadi ring sor :

ha. Ekasata;	ra. Resi gana;
na. Panca sata;	ka. Tawur Agung;
ca. Panca sanak;	da. Panca kelud;

- 5) Sajawaning kadi ring ajeng kawentenang upakara :

ha. Majot-jotan utawi yadnya sese nyabran wusan ngarateng;
na. Masapuh-sapuh rikala pacang wali ring pura;
ca. Pacaruan pasasihan kelaksanayang nangken tilem ngawit sasih ka
5,6,7,8 lan ka 9, sajawanin wenten durbiksan jagat.

Pawos 51

- 1) Nangken ngawarsa rikalaning Tilem kasanga kawentenang tawur kasanga, kalanturang antuk ngarupuk, makahcina pacang mapag rahina panyepian banjange.

- 2) Brata panyepian sane kamargiang olih Krama Desa;

ha. Amati geni; tan kengin maapi-api;
na. Amati karya; tan kengin nyambut karya;
ca. Amati lelanguan, tan kengin maoneng-onengan, masura gora, lan sapanunggalannya;
ra. Amati lelungan, tan dados malancaran.

- (3) Pabratan inucap kamargiang sakeng semeng ngantos semeng benjangne raris kasuwarayang kulkul pinaka cihna pangembak.
- (4) Sang mamurung kecap ring ajeng keni pamidanda manut pararem, kamargiang olih pateuk (Pacalang Desa).
- (5) Riwus rahina Nyepi (benjangne) maka cihna pangawit Isaka Warsa, patut warga Desa sami madharma Santi

PANCAMA SARGAH SUKERTA TATA PAWONGAN

Palet 1

Indik Pawiwahan

Pawos 52

- (1) Pawiwahan inggih punika patemon purusa kalawan pradana, malarapan panunggalan kayun suka lila kadulurin upasaksi sakala niskala.
- (2) Pamargian pawiwahan luwire :
 - ha. Pepadikan, kamanggala antuk pakrunayan;
 - na. Ngarorod, marangkat riyin wawu kakrunayang;
 - ca. Nyeburin utawi sentana nyeburin (risampun nganutin upakara pamerasan).
- (3) Pidadab sang pacang mawiwaha patut :
 - ha. Sampun manggeh dahan-taruna (prasida nganutin Undang-undang)
 - na. Sangkaning pada lila (tan kapaksa);

- ca. Manut kecap sasta Agama (tan gamia gamana);
- ra. Kasudiwadani prade pangambile tios Agama utawi kapitiwangi.
- 4) Pamargin pawiwahan mangda taler nganutin Undang-undang Perkawinan sakeng Sang Ngawawenang.

Pawos 53

- 1) Pawiwahan sane kapatutang ring Desa, sakadi ring sor :
 - ha. Sampun kamargiang pabyakala utawi pasakapan, kasaksiang sakala niskala olih Pandita utawi Pinandita;
 - na. Wenten pasaksi Prajuru sane makelingang utawi ngilikitayang pawiwahan;
 - ca. pawiwahan inucap ring ajeng sampun kacatetang ring sang Ngawawenang.
- 2) Parabian sane tan manut kadi kecap ring ajeng sinanggeh tan patut.

Pawos 54

Tata caraning parabian patut sakadi sor :

- ha. Sapa sira ugi-pacang ngawarangang pakulawarganya patut masadok ring Prajuru selanturnya Prajuru maritatas manut tan manut pamargian parabine;
- na. Pamargin pepadikan manut dudonan :
 - 1) Pakrunayan melarapan antuk canang pangerawos/daksina pejati.

2) Risampun puput raris sang istri kaajak budal ring pakubon sang lanang, saha kalanturang antuk pabyakala.

3) Mangda puput tumus sakala niskala, raris kaluwarga purusa makta pajati ring Pamarajan wadone.

ca. Prade ngarorod/marangkat patut :

1) reraman lanange ngawentenang pamilaku pangenduh antuk duta sakirangnya 2 (kalih) diri;

2) pagenahan antene tan kengin ring pakubon sang lanang sadereng mabeyakala.

ra. Sajeroning pakrunayan/pangelukuan patut :

1) kamanggala antuk geng pangampura arep ring reraman wadone;

2) kaigumang bawos idih pakidih utawi palegayan arep ring pasewakan sang ngidih saha dewasa pakrabkambeyane riwekas;

3) kacihnayang indik kapurusa utawi prade sentana rajeg kajejerang kapatut ngidih anak lanang sane kabawos pawiwahan nyeburin, tur risampun sulur pamerasan kategepin kamanggehang sentana nyeburin;

4) prade tan terima pajati, pakrunayan kamargiang jantos ping tiga.

ka. Pakerab-kambeyan mapiteges upacara tinas apadang (puput) makurenan, dwaning manut sakadi ring sor;

- 1) Sajeroning kabawos ambe, kalaksanayang ring sakala niskala masarana jejauman miwah pawidi widana
ha) jejauman pinaka ngambe/ngadungang kayun soang-soang pakaluwargan wadone;
na) widi widana pinaka pajati niskala nunas wadone ring Pamarajan.
- 2) Sajeroning kabawos kerab pamargi ring sakala :
ha) antuk panyaksi Krama dwaning kaparabian matengeran suwaran kulkul;
na) pamekas pasaksi Prajuru sane ngilikitayang.

Palet 2

Indik Nyapian

Pawos 55

- 1) Pawiwahan prasida kawusang malarapan antuk palas parabian utawi kapademan.
- 2) Wusan makurenan riantuk salah sinunggal seda mapitesgas balu, makadi balu lanang/istri
- 3) Palas parabian inggih punika sangkaning mawiwit wicara.
- 4) Sang ayat palas marabian patut atur supeksa pailikitan riyin ring sang Rumawos wastu tinas apadang pamutuse kabawos nyapian wawu

Prajuru nyobyahang kawentenannya ring Desa saha keni panebas swaran kulkul manut pararem.

Pawos 56

Tata cara palas parabian sakadi ring sor :

1. Nawur prabeya pasaksi sinalih tunggil sami matenga;
2. Pagunakayan polih pahan pada;
3. Pabekel, tadtadan soang-soang kakuasa niri-niri miwah warisan kakuasa olih purusa;
4. Ngaweruhin miwah ngupajiwain pratisentana manut swadharmaning guru rupaka;
5. Nawur pamidanda panebasan swaran kulkul manut pararem;
6. Ngelung jinah logika Prajuru;
7. Mapamit ring pamrajan langane.

Pawos 57

Prade riwekas sang palas kacihnan adung malih, patut :

1. ngalaksanayang pawiwahan malih;
2. kadanda nikel saking palase, tanjek laler kawastanin.

Pawos 58

1. Sang balu kabinayang dados ;

ha. Balu luh wit sentana (sentana rajeg) miwah balu luh boya senata;

na. Balu muani kapurusa (wit sentana) miwah balu muani nyeburin
(boya sentana);

2) Swadharmaning balu inucap patut ;

ha. Ngamanggehang patibrata tan kengin ngamargiang paradara/drati
krama;

na. Nguasayang waris pagunakaya, tan dados ngadol, ngadeang,
makidihang lan siosan punika, sajawaning kabebasanang olih pianak
utawi kulawarga pinih tampek sakeng kurenannya prade pianak
kantun alit-alit.

ca. Kengin ngidih sentana prade wenten pidabdab sadurung sinalih
tunggil padem, saha kabebasanang olih kulawarga sakeng kapurusa;

ra. kawenangang mawiwaha malih, prade wenten kabebasanang manut
angka/aksara ring ajeng.

Pawos 59

Balu kaucap tan pageh sakadi ring sor ;

ha. Dratikrama utawi paradara;

na. Matilar saking pakubon tan pasadok jantos 6 (enem) sasih;

ca. Lempas ring swadharma sewos-sewosan, tan prasida ngehehin solah
maprawerti arep ring pituduh sane patut sakeng kulawarga purusa.

Palet 3

Indik Sentana

Pawos 60

- (1) Sentana wenten kalih pawos, sane kaucap pretisentana, miwah sentara paperasan.
- (2) Pretisentana inggih punika sentana sane metu saking pawiwahan kapatut.
- (3) Prade pawiwahan tan kapatut ngawetuang sentara, mangda tan kanton kawastanin babinjat utawi astra patut kamanggala antuk panyangaskara.
- (4) Prade pawiwahan tan ngawetuang sentana kengin ngidih sentana antuk upasaksi sekala niskala sane kawastanin sentana paperasan.
- (5) Sentana rajeg inggih punika, pratisentana wadon (pradana) sane kamanggehang lanang (purusa) tur risampun ngalaksanayang pawiwahan keceburin.
- (6) Sang sane dados kaarsayang sentana rajeg inucap wiwit angka (5), inggih punika;
ha. Pratisentana wadon tunggal;
na. Sampun kamanggehang dados pratisentana lanang (purusa);
ca. Kapawiwahan keceburin kautamayang antuk jadma sane maagama hindu utawi jadma sane maagama siyosan sane sampun ngelaksanayang pamarisuda raga utawi sudiwadani;

ra. Sane ngamanggehang sentana rajeg patut mapasadok ring Prajuru
Desa tur I Bendesa patut nyobyahang ring Desa.

Pawos 61

- (1) Ngangkat sentana manut dudonan patut makacihna arta berana pemerasan sane kasaksiang sekala-niskala;
- (2) Sapa sira ugi krama pacang ngidih sentana patut masadok ring Bendesa sanistane 3 (tigang) sasih sedereng pemerasan. Bendesa ngalanturang pakarsa punika ring sang ngawawenang;
- (3) Bendesa nyobyahang ring sawidangan Desa, sang sapa sira ugi rumasa tan lila mangda nyadokang masengker kalih uku (14 rahina) sabanen pamerasan ring Bendesa;
- (4) Prade sulur paperasan tan manut kadi kecap ring ajeng, Prajuru Desa wenang ngandeg sang pacang mameras saha ngicenin pamutus mangda kapatutang riyin babawos, sulur utawi wicaranya;

Pawos 62

- (1) Paperasan sane kapatut ring Desa risampun makacihna ;
ha. Widi-widana paperasan;
na. Kasaksinin olih Prajuru Desa sane makelingang utawi ngilikitayang.
ca. Kasobyahang ring wawidangan Dasane.

- (2) Sane kapatut peras angge sentana kadi ring sor ;
- ha. Jatma maagama Hindu
 - na. Papernahan nedunang saking sang meras;
 - ca. Kulawarga saking purusa, prade tan wenten kengin sakeng wadon,
yening taler tan wenten wawu kangin sakama-kama (saking kayun);
 - ra. Kautamayang saking waris pancer kapurusa;
 - ka. sinalih tunggil mawiwit saking kulawarga tunggal sanggah utawi
merajan, paibon lan dadia utawi ngambilin anak tios sakewanten
sang maagama Hindu.
- (3) Kengin ngangkat sentana langkungan ring adiri, lanang wiadin wadon,
prade ngangkat sentana lanang wadon, nenten dados kapawiwahang.

Palet 4

Indik Warisan

Pawos 63

- (1) Warisan inggih punika tetamian arta berana saha ayah-ayah ngupadi
kasukertan sekala lan niskala saking kaluhurannya arep ring
turunannya.
- (2) Sane sinanggeh warisan luwire ;
- ha. Duwe tengah, makadi tegal, ayahan Desa, Kahyangan, Pusaka siwa
pakarana lan sapanunggalanya;
 - na. Pamerajan;

- ca. Pagunakayan, tadtadan/jiwa dana, hutang piutang.
- (3) Wawu kengin kabawos warisan prade wenten;
 - ha. Sang mapiturun (pawaris);
 - na. Katurunan (ahli waris);
 - ca. Arta berana miwah tategenan makacihna warisan.

Pawos 64

- (1) Ahli waris luwire ;
 - ha. Pratisentana purusa;
 - na. Pratisentana pradana (sentana rajeg);
 - ca. Sentana peperasan lanang/wadon.
- (2) Prade tan wenten sakadi ring ajeng, kang sinanggeh ahli waris;
 - ha. Turunan purusa pernah ngunggahang, rerama lanang, pekak selanturipun rerama misan, mindon;
 - na. Turunan purusa pernah kasamping makadi kaponakan, misan, mindon.

Pawos 65

- Swadharmaning ahli waris patut ;
- nerima saha nguwasayang tetamian pahan saking kaluhurannya, makadi ngarempon sanggah, Pura saha pangupakaranya miwah nyelidihinin ayah-ayahan pawaris;

- ca. ngabenang pawaris saha ngalanturang upacara-upacara pitra;
- ca. nawurin hutang-hutang pawaris sane manut pangeloika.

Pawos 66

Pangepahan waris manut sakadi ring sor ;

- ca. Risampun kalaksanayang Pitra Yadnya lan hutang-hutang pawaris buntas katawur;
- ca. Para ahli waris polih pahan pada sangkaning pagunakayan. Sajabaning karang/tegal, ayahan Desa kaamong olih ahli waris kang sinanggeh Krama marep;
- ca. Sinalih tunggil ahli waris kengin tan polih pahan prade ;
 - 1) Nilar kawitan lan sesananing Agama;
 - 2) Alpaka guru rupaka;
 - 3) Sentana rajeg kesah mawiwaha utawi pratisentana nyeburin, soang-soang kabawos ninggal kadaton;
- ca. Boya ahli waris kengin muponin hasil manut dudonan luwire ;
 - 1) Sentana luh salami dereng kesah mawiwaha utawi tan alpaka guru miwah prade madrebe pianak tan kaangkenin olih wong tua rare inucap, kengin ngawaris wantah pikolih pagunakaya sentana luh inucap kemawon;
 - 2) Balu luh wiadin muani nyeburin (soang-soang boya sentana);

- 3) Mulih dahi utawi teruna, riantukan ring pawiwahane pecak sampun kabawos ninggal kadaton;
- 11 Pawaris kengin meweweh rikala maurip pinaka jiwa dana, tadtadan/bekel, makacihna peweweh tetep ring panak sane kesah mawiwaha.

Pawos 67

- 1) Prade sajeronin pakuluwargan wenten ahli waris langkungan ring adiri patut ;
- ha. kawentenang paigum indik pedum waris inucap;
- na. yen tan prasida katunasang tatimbang ring Prajuru (Kerta Desa);
- ca. prade taler tan wenten cumpu ring panepas Prajuru (Kerta Desa), keingin katumusang ring sang Rumawos.
- 2) Prade karang inucapa kaputungan, patut Prajuru nibakang ring ;
- ha. sang sinanggeh ahli waris manut pawos 64;
- na. sang kengin anggen sentana manut pawos 62 angka (2) miwah angka (3);
- ca. prade taler tan wenten cumpu ring panepas Kerta Desa kengin katumusang ring sang Rumawos.
- 3) Prade jantos karang Desa kaepah utawi kasepih, patut soang-soang nedunin makrama Desa marep.

SAT SARGAH
WICARA LAN PAMIDANDA

Palet 1

Indik wicara

Pawos 68

- (1) Sane wenang mawosin makadi mutusang wicara ring Desa inggih punika Prajuru Desa sinanggeh Kerta Desa.
- (2) Tata dudonan mawosin saha muputang wicara warga desa kadi ring sor; ha. Kaping ajeng kabawosin olih Bendesa lan Kerta Desa; na. Tan cumpu ring panepas Bendesa karerehang pamutus ring paruman Desa Pakraman.
- (3) Prade sang mawicara tan wenten cumpu ring pamutus paruman Desa lan Kerta Desa, kengin nunasang wicara inucap ring sang Rumawos

Pawos 69

- (1) Sahanan wicara mawiwit kacorahan saka luwire sinanggeh nungkasin daging Awig-awig, pararem miwah paswaran Desa, Prajuru patut digelis mawosin tan nyantos pesadok.
- (2) Sajaba wicara kadi ring ajeng patut nyantosang pasadok sang nunas bawos.
- (3) Panepase patut pastika nyantenang iwang patut malarapan Tri Pramana (saksi, ilikita bukti) miwah tan maren nepek ring Catur Dresta.

Palet 2

Indik Pamidanda

Pawos 70

- (1) Desa wenang niwakang pamidanda ring warga Desa sane sisip ;
- (2) Paniwak inucap kalaksanayang olih Bendesa;
- (3) Bacakan pamidanda luwire ;
 ha. ayahan panukun kasisipan;
 na. danda arta;
 ca. kasepekang, mapiteges tan polih arah-rah, suwaran kulkul lan
 penyanggran Desa.
 ra. kanorayang, mapiteges kauwusan dados krama.
- (4) Pamidanda sane katiwakang patut masor singgih manut ring kasisipane.
- (5) Jinah utawi arta brana pamidanda ngaranjing dados druwen Desa.

Pawos 71

- (1) Krama sane langkungan ring tigang paruman ngalantur tan nawur
 urunan miwah dadandan wenang karampag.
- (2) Rerampagan ngangge tata cara kadi ring sor;
 ha. Kalaksanayang olih Prajuru kasarengin olih Krama saakeha tigang
 diri maka saksi;

- na. Sang ngaranpag sangkanin darsana ngambil barang utawi nyawenin tenem tuwuh, akehnya manur ring utang sang karampag, sang karampag mangda lila nyukserahang barangnya sane dados wala;
- ca. Prajuru miteketang mangda barang-barang sane karampag digelis katebus, masenger awuku (7 rahina) ring kutus rahinane pacang kaadol;
- ra. Tan nganinin saluwir barang sane inggilang manut Agama miwah tang mademang pangupa jiwa sang karampag.

Pawos 72

- (1) Prade sang pacang karampag ngawara (ngalangin) pelaksanan inucap mawastu sampun tan nganutin Awig-awig Desa wenang karang Desa sane kagenahin kadaut olih Desane.
- (2) Samaliha yen purun taler ngalangin palaksanan kadi ring ajeng tan wenten pamargi sajawaning kasepekang/kanorayang olih Krama Desane.
- (3) Pamidanda inucap ring ajeng keni buntas risampun sang kakeninin; ha. nunas geng pangampura ring Krama Desa riantukan nguak pasubaya (pararem) pecak; na. nawur pangargan panguak pasubayane duk pacang karampag kadulurin pamrayascita panyapsap kaiwangane ring Desa.

SAPTAMA SARGAH
NGUWAH-NGUWAHIN AWIG-AWIG

Pawos 73

- (1) Nguwah-nguwahin Awig-awig Desa puniki kalaksanayang ring paruman Desa.
- (2) Awig-awig puniki kamargiang ngawit kaingkupin (kararemin).

Pawos 74

- (1) Sakaluwirin sane wenten saderengnya patut kaanutang ring sadaging Awig-awig puniki.
- (2) Sakalurin sane durung kabawos sajeroning Awig-awig puniki patut kalaksanayang manut tata cara sane sampun mamargi kadulurin antuk pararem-pararem.

ASTAMA SARGAH

SAMAPTA

Pawos 75

- (1) Awig-awig puniki kararemenin duk rahina *Radite Umanis* pananggal/pang 5 sasih *Katiga* isaka 1923 tanggal Masehi 7 Oktober 2001 ring wantilan Desa Pakraman Susut.
- (2) Awig-awig puniki kalingga tanganin olih Bendesa lan Prajuru Desa, saha olih Prajuru Dinas pinaka saksi.

(3) Luwir sang ngalingga tanganin :


ha. Kaprathama, Prajuru Desa :

1. Bendesa




I NYOMAN SUASTAWA, S.Pd.

2. Penyarikan



I NYOMAN SWIRANATA

na. Kaping Kalih, Prajuru Dinas Pinaka Saksi :

1. Kepala Dusun Susut





I WAYAN JANA

2. Kepala Desa Buahon



I NYOMAN SUARJAYA

3. Camat Payangan




Drs. I MADE SARI SUDARMA PUTRA

Mengetahui dan telah dicatatkan

Pada tanggal : 6 Nopember 2002
Nomor : 29 Tahun 2002

BUPATI, GIANYAR




TJOKORDA GDE BUDI SURYAWAN, SH.